

مراضى على الطهطاوى

# حبة مشاعر ع الورق

أشعار بالعامية المصرية

يناير ٢٠١٩



## بطاقة الكتاب

--

عنوان المؤلف : حبة مشاعر ع الورق  
المؤلف : راضي علي الطهطاوي  
التصنيف : أشعار بالعامية المصرية  
رقم الإيداع : ٢٠١٩/٢٩٠٢ :  
عدد الصفحات : ١٠٠ صفحة  
رقم الإصدار الداخلي : ٣٢٤  
تاريخ الإصدار الداخلي : ٢٠١٩ ، طبعة أولى  
تصميم الغلاف والتنسيق : الشاعرة منى الغريب

جميع حقوق الطبع والنشر محفوظة للشاعر، ولا يحق لأى دار  
نشر طبع ونشر وتوزيع الكتاب إلا بموافقة كتابية وموثقة من  
الشاعر

-----

### دار النيل والفرات للنشر والتوزيع

ثورة مصرية تشرق إشراعا على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 تليفاكس: 020554372901

alnilwaalfourat@gmail.com alnilwaalfourat

المقر الرئيسي: ج.م.ع محافظة الشرقية - العاشر من رمضان - مجاورة 13 - امام سنتر الم3 - قطار 304

# إهداء

إلى: روح أبي " رحمه الله "

وإلى أمي "حفظها الله"

إلى: زوجتي وأبنائي

إلى: أخوتي.. وأقاربي وأصدقائي

إلى : زملائي.. ومعارفي وجيراني

إلى : أساتذتي... وتلاميذي

راضي على الطهطاوي

عضو اتحاد كتاب مصر

محاضر مركزي بوزارة الثقافة

## أسرار السعادة

ازرع قلبك كله محبه  
ازرع كل القلب حنان  
املا حياتك خير وتسامح  
تلقى جنابين ورد تبان  
أملك يصبح نور فى طريقك  
رشرش فرحة ف كل مكان  
اوعى الضحكه تفارق وشك  
اقفل للتكشير به بيبان  
انسى الماضى وكل جراحه  
ارسم حلم بايد فنان  
اغنى كل ساعات الحاضر  
اياك تدي العمر أمان  
مهما الشمس تغيب راح تطلع  
بس الفرحة دي ليها أوان  
خلّى الطير فى سماك بيرفرف  
سيب لحسان الفرحة عنان  
ربك شايف كل حمولك

بعد الشِّدة هتلقى حنان  
سيب الحلم يقول غناويه  
سيبه يطير زى الغزلان  
دوس على حزنك سَمِّي وعدِّي  
تلقى الضحك عزف ألحان  
ابدر كل البهجة بإيدك  
تفضل عطر ف كل زمان  
ازرع قلبك كله محبه  
ازرع كل القلب حنان

.....



## لو زرعت

لو زرعت الخير فى قلبك

راح يخضرلك أمان

لو رَميت

بذرة محبة ف أرض بور

رغم أوجاع السنين

ولّا ف الإنبات جنين

بُكره تطرحلك حنان

لو ترش النور فى سكه

لجل واحد يمشى فيها

عينه تفرح بالخطاوى

والونس بالحضن طاوى

الأمل يعزف كمان

لمّا تسهر فى الليالى

والأنين والذكرى فيك

والحنين لمّا يناديك

كنت تعذرنى ف مشاعرى

تفتكر عمرى اللى هان



لَمَّا تَمْسَحْ دَمْعَ غَيْرِكَ  
وَتَنَادِيهِ

كَلِمَةً حُلُوةً تَقُولُهَا لِيهِ

ضِحْكَتِكَ رَغْمَ الْجَفَا

كَفْ طَبْطَبَ بِالْذَفَا

تَتَفْتَحُ لِيكَ الْبَيْبَانَ

لَمَّا تَرَسِّمُ لِبِتْسَامَةِ

فَ وَشِ كَارِهِ

بِالْمَحَبَّةِ وَتَدَادِيهِ

يَنْقُفِلُ جَرَحَ الزَّمَانِ

لَوْ عَرَفْتَ الشُّوقَ صَحِيحَ

أَوْ بَعَادَ خَلَاكِ جَرِيحِ

وَلَا شَوْكَ الْوَرْدِ يَقْسَى

كَانَ هَيِّصُكَ جَنَانَ

طَوَّلَ مَا بَتَفَكَّرَ فِي نَفْسِكَ

وَالْحَيَاةَ وَيَاكَ مُصَالِحَ

كُلِّ هَمِّكَ بَسْ تَكْسِبُ

رَاحَ نَسَمِيِّكَ أَلْعَبَانَ

الَّذِي زَيَّكَ

امتى يصحى أو يفوق؟!  
يجرى دم الإنسانية ف العروق  
امتى إحساسك يطيب  
يبقى بلسم كالحليب  
امتى يصفى أو يروق؟!  
يسري نبضه في العيدان  
الرجولة ليها معنى  
وميت أماره  
مش فلوس.. مكسب.. خسارة  
مش مجرد شعرتين  
من شنب ويّاك تبان

.....



## حكاية عشره هانت

بعد العمر حبيبي دا كله

هنت عليك؟!!!

دا انت بجد صحيح غدار

كنت بقولك قبل مانبدأ

خلي الإخلاص يبقى المبدأ

إياك تيجي ف لحظه تبيع

اوعى الحب بتاعنا يضيع

عشان يفضل بيتنا عمار

ياما صبرت معاك وعانيت

كنت أتحمّل

ومعاك ياما بنيت ف البيت

قلت عشان أولادى هاكمّل

كنت تخاصم أجى أصالحك

تقسي أسامحك

عُمرِكَ حتى ماقلت ف يوم

كلمه رقيقة عشان تتجمل

حتى هزار

عمرى ماجيت ف حزنك سيبتك  
كنت بحافظ ليك على هيبتك  
بس ماكنتش عايز تفهم  
إننى شريكة العمر حبيبتك  
ليه ورّيتنى نجوم ف نهار؟!  
مُحك فيه أفكار هدامه  
حاسس إنى يا دوب خدامه  
كنت اتمنى بس رضاك  
ياما عشائك  
شوفت الويل بغلاسة أهلك  
واخدع نفسى واقول مااستاهلك  
واتحملت كتير لـ حماتى  
لمّا تشوفنى تقول وتهاتى  
رغم نكدها .. وكل عُقدها  
أضحك ليها .. واقوللها باتى  
ياما عشائك  
كنت بخلّى اللقمة بتاعتى  
ياما عشائك  
بعث أنا حلقى وعقدى وساعتى

وانت كمان تستهزأ بيًا  
تجرّح فيّا تقوللى لسعتى  
خدتك وانت يا دوبك حافى  
خليت رمشى غطاك ولحافى  
جاي تقوللى جوازتك غلطة  
ناوي تجيبلى الموت بالجلطة  
قال معرفتش ايه تختار  
عمرى ماجيت وف مره جرحتك  
كنت تروح و تسيبنى لوحدى  
ترجع آخر الليل على راحتك  
عقلك فيه تفكير متخلف  
حاسس إنّى مجرد فرخة  
بس يادوب تفقس وتخلّف  
كنت الطاعة ليك والسمع  
كل صوابي بقيدها بشمع  
لكن أصلك حن وبان  
اللى بيخلص ليك يتهان  
ياما عيونى مليتها بدمع  
ومعاك كل دليلي احتار

كنت تفكر بس ف نفسك.. كنت أنا  
مشغول دايمًا عن أولادك  
سايب بس الأم تعاني  
مشغول عني وقال مش فاكر  
تيجي ف يوم مع ابن تذاكر  
شفت الخير على إيدى وناكر  
شخط معايا وكل زعيق  
لما تقابلك ست غريبه  
الحنينه تبان على وشك.. تبقى رقيق  
وأنا من غيرتى وحيرتى ف نار  
ناسي الواد وناسي البيت  
قاعد بس يادوب ع انت  
ولا غمرك ما بتمسح أوضه  
وحارمنى الماكياج و الموضه  
وتجرح ليًا شعورى كَا سِت  
خليت كل حياتي مرار  
بعد العمر دا كله أنا هونت  
دا انت بجد صحيح غدار

.....

## رسمتك

رسمتك أحلى لون طيفي  
يا أول ضحكه من فرحي  
يا زارعة الضل فوق صيفي  
يا بلسم داوى لى جرحى  
ورش الضي في حياتي  
وشال الحزن وأنيه

....

يا مالية كتابى بحروفك  
وماسحة كلمتك دمعى  
يا زارعة الفل ف كفوفك  
يا نجمة حب فوق شمعى  
بكاس الطيبة راويانى  
ياشهد العمر وسنيه

....

با أجمل حرف ف سطورى  
هواكى نسيم على عرقى  
يا سايبه الذكرى ف عطورى

يا أجمل كلمه فوق وَرَقِي  
يا قصة ليل بتتغنى  
ولحن العشق بتزينه

...

يا شمس القلب وهلاله  
وطير غرّد على عشه  
دا بيكي العمر يحلاله  
وضحك البهجة فوق وشه  
دا بعدك نار بتكويني  
يزيد النبض وحنينه

.....

## حفلة الزواج.. آدم وحواء

لَمَّا حَوًّا شَافَهَا أَدَمُ  
قَلْبُهُ لِيَهَا رَقَ مَالٍ  
قَالَهَا مَخْلُوقَةٌ مِنِّي  
والتَقَاها عَلَى الْجِبَالِ  
كَنتَ مِنْ غَيْرِكَ هَاتُوهُ  
وَالْحَيَاةُ تَبْقَى انْعِزَالِ  
قَلْبِي يَعِشُقُ بَسْ مِينِ  
وَحَدَّثِي فِيهَا اعْتِلَالِ  
قَالَهَا لِبَعْضِ اتَّخَلَقْنَا  
وَأَنْتِي زَوْجَتِي بِالْحَلَالِ  
فَاكْهَةِ الْبَسْتَانِ دَا مَهْرِكَ  
وَالْوَرُودِ فَسْتَانِ وَشَالِ  
وَالْغُصُونِ نَعْمَلُهَا كَوْشَةَ  
وَالْوَفَا أَجْمَلَ مِثَالِ  
وَالْوَسْعِ دَا كُلَّهُ بَيْتِنَا  
بُكْرَهُ نَمْلَاهُ بِالْعِيَالِ  
فَرِحْتَ الْأَرْضَ بِزَفَافِهَا

والحنان ف النبض سال  
والطيور غنت موسيقى  
والشجر رقص احتفال  
والشهود كانت ملايكة  
حفلة كانت م الخيال  
انتي أغلى نعمة عندي  
واهجرِك دا شئ محال  
ربنا خالقك هدية  
تملأ كل الكون جمال  
بيننا احنا الدنيا تعمر  
بالونس نبقي اكتمال  
والأنوثة سر فيكي  
والبدور جنبك هلال  
والأمومة نابغة منك  
حُب مخلوق م الكمال  
دا اللي ياذى الست حوّا  
يبقى جواه اختلال

.....



## دفيانة بيوت

دفيانة بيوت من ورق التوت  
واللحظة تفوت بالحنن نموت  
ع العمر الضائع من إيدنا  
دفيانة بيوت لو فيها حنان  
تشعر بأمان وتغنى كمان  
على عزف الغنوة اللي ف عيدنا  
دفيانة بيوت و ف عز البرد  
القصة دي سرد مجموع أو فرد  
لشموع الفرحة ياناس قيدنا  
دفيانة بيوت بالخير والناس  
وقمر ونَّاس ولا قول دنَّاس  
دا الكلمة الصح اللي تفيدنا  
دفيانة بيوت وسعادة تهل  
والبركة تحل ولا رزق يقل  
وبندعى يا رب كمان زدنا

.....

## اللى زيّك

مش بيز عل قلبى مِنْه

لو هتسأل بس ليه

أصل إنّه

زى كدبك مين يفنّه؟!!

والهجوم دايمًا تشنّه

رغم عمرك رغم سنّه

لو عاتبتك

يبقى ليك جوايا قيمة

كله عادى.. قُربى منك أو بعدى

مش هتفرق عندى حاجة

طول ما قلبك ضحّى.. باع

مش حكاية إنك تنادى

أو تقول كلمة وداع

حتى أسف طالعة منك

كلها جفوة وشروود

كل دا جواك برود؟!!

يااااه..

دا انت حالتك مستفزة  
والحياة وياك سنيمة  
يالالا.. سيبك م الحيال  
والمراوغة ولحتيال  
الإجابة مقنعة  
مهما تلبس أقنعة  
كله باين من ملامحك  
لو هاخصمك أو هاسامحك  
كنت صفحة وانطوت  
ف اللاشعور  
مهما حولى تطوف تدور  
من زمان قلبى اقتنع  
إن حبك مصطنع  
مهما بتزوق كلامك  
ف العيون بصات لئيمة  
اللى زيّك مش بيزعل قلبى منه  
لو عاتبتك يبقى  
ليك جوايا قيمة

.....

## الإرهاب

تعرف الإرهاب يا حضرة ؟!

تعرف الإرهاب يا بيه ؟!

هُوَ واحد م الأبالسة

قلبه أعمى من عينيه

راضع الحقد بضغينة

والشيطان سَيِّطَر عليه

يجرى دائماً في الخراب

تغرس الأحزان إيديه

لَمَّا ييشوف الدموع

م الفرح يرقص باليه

عاشق الفتنة بدمارها

لجل كَذْبة أو جنيه

يقتل النفس البريئة

ويستبيح الدم ليه ؟!

أى دين ويَّاه يقوله ؟!

العبادة دى أربجيه

ولاً مين سَمَم دماغه

ولاً جنسه هوه ايه؟!!!  
عُمره ما داق المحبة  
جاي من الشر وإليه  
هوه ده الإرهاب يا حضرة  
هوه ده الارهاب يا بيه

.....

## مهما العالم مُرّ

مهما العالم يصبح مُرّ  
انتَ الشَّهَد اللى محلَّيه  
انتَ الحب الشاغل بالي  
انت حياتي وبالنسبالي  
صوت الحلم اللى معلَّيه  
عايش قلبي جوه الكون  
بس وحيد  
ليه تهجرني تروح لبعيد؟!  
وانت الحُضن اللى مدفيه  
ياااه ع الحزن المالى قلوبنا  
كل ما يفضى  
نلقى الدنيا بتعبيه  
ياااااااااااه ع الحزن  
اللى معشش جوا الروح  
بس عيونا بتخبيه  
اوعى حبيبي تروح وتسييني  
دا انت النبض العايش بيه

انت ف سكة ضلمه الضى  
وانت الحلم العايش ليه  
رغم الزيتة وكتر الناس  
وساعات يبقى الصوت وناس  
لكن لما تغيب عن قلبى  
مين غير روحك بتسليه؟!  
مهما الدنيا بتسأل عنى  
مهما الناس بكلامي تغني  
بعد غيابك عنى حبيبي  
كل العالم يصبح تيه

.....

## الوطن غالى

موطن الإنسان ده غالى  
زى حضن الغاليه أمه  
أصلنا جاى من ترابه  
نعشقه بالروح نضمه  
دا اللى يجرح يوم بلاده  
يلقى لعنه عليه تغمه

...

موطن الإنسان دا غالى  
فيه أساسه وفيه جذوره  
والفروع مرويه منه  
والحنان حاضن بذوره  
حتى لما يا ناس نموت  
روحنا تشتاق ليه تزوره

...

موطن الإنسان دا غالى  
من هواه الخير تشرب  
واسألوا اللى مرّة سافر



واسألوا اللي داق وجرب  
راح يقولك فرع ميّت  
اللي عن أهله تغرب

...

موطن الإنسان دا غالي  
مهما شُفنا فيه جراح  
مهما يقسى علينا لحظة  
بالمحبة يفيض براح  
مين في أرض الكون يساعنا  
لو وطنًا ف يوم دا راح؟!

..

موطن الإنسان دا غالي  
شوف ملامحك فيه وشكلك  
أوعى مرّة يهون عليك  
حتى لو كترت مشاكلك  
دا الوطن أهلك وناسك  
لو شواك عمره ماياكلك

...

موطن الإنسان دا غالي

وكلنا فيه نستكن  
رَى قلب الأم يحضن  
لو بكيت يصرخ يئن  
ومهما تقسى ف يوم عليه  
بالمحبة عليك يحن

...

موطن الإنسان دا غالى  
ضلتك تلقاه وحيطك  
لو فى يوم هتروح بعيد  
باشتيق هيشد خيطك  
لو يجف الكون عليك  
هوّه بستانك وغيطك

.....

## طقوس شاعر

باكتب الأشعار دى عادة  
قهوتى دائماً زيادة  
لمّا فكرة تفوت عليّ  
باهجر النوم والوسادة

..

باكتب الأشعار دى غيّة  
والغزل ف عيون بهيّة  
كل نسمة من جمالها  
ملهمة أفكارى هيّه

...

باكتب الأشعار هواية  
وزن حرف معاى غواية  
حتى لو جف المداد  
دمى ينزف للدواية

..

ربة الشعر بتيجينى  
أصحى م النوم غصب عنى

لَمَّا تَنَدَّه تَرْتَجِينِي  
بَاكْتَبِ الْأَشْعَارَ وَاعْنَتِي

..

قَالُوا أَشْعَارُكَ ظَنُون  
سِحْرُ هَذَا وَمَشْ فَنُون  
قُلْتَ لَكِنْ فِي الْحَقِيقَةِ  
شَعْرِي دَا حَالَةٍ جَنُون

..

حَتَّى لَوْ قَاعِدَ لِأَكْلِي  
الْوِلَادَ يَلْقُونِي سَارِحَ  
كُلْهِمْ بِيَشُوفُوا شَكْلِي  
زَى مَشْهُدَ عِ الْمَسَارِحِ

...

لَمَّا بَتِيجِينِي الْقَصِيدَةَ  
بَابَقَى زَى السِّتِ حَامِلِ  
مِ الْوَجْعِ وَالزَّنْقَةِ أَصْرُخِ  
لَمَّا يَنْزِلُ ابْنِي كَامِلِ

...

بَاكْتَبِ الْأَشْعَارَ مُحِبَّةَ

أرسم الضحكة ف سطور  
وارمى كلمة زى حبة  
تطرح الفرحة وسرور

...

أسكت امي تقوللى مالك  
رمش عينك بان عليه  
مش عاجبنى أمر حالك  
خدنا م الأشعار دى إيه؟!!!

.....

## الواد الندل

كان يلعب على بَري وشطى  
ولا عمرى كَشَرْت ف وشه  
علمته ازای يحبى يخطى  
ويحوش الدِّبَّان ويهشه  
بقى نجم ويلبس ع الموضة  
ويقوللى هتجيبلى العار

...

علمَّته حقوق خالة وعمه  
وتعبت معاه وربيته  
والصحبة الحلوة واللّمة  
وازاى بيحافظ على بيته  
بقى يمشى يعاكس ف الشارع  
طردوه م الحتة وراح غار

..

الواد الندل الخربان  
علمَّته ازای كدا يتكلَّم  
يا ما كنت براعى ف إحساسه

وازاى بيمد وبيسلّم  
والكل بيرجع لأساسه  
راح سابنى وبكل بجاجة  
وهجانى لما قال أشعار

..

علمته ازاي يعلا ويبنى  
والطوبة بايدى بالافيه  
وعاملته بحنان زى ابنى  
ولا حاجة بتتمر كدا فيه  
ولا مرّة بيسأل كدا عنى  
ولا مرّة عزمى على فطار

..

الواد الندل الخربان  
علمته يفتل ويجدّل  
وازاى يراعى شعور غيره  
علمته يعوم كدا ويبدّل  
راح غيّر كل خطوط سيره  
وبيرقص لو شافنى حزين  
ع الطبل البلدى ومزمار

..

الواد الندل الخربان  
كان لسه صغير ف اللفة  
وباجيله الزعبوط وحلاوته  
وبرمش عيوني بيدقاً  
والكل بيشهد بغلاوته  
من قولي بيسخر ويعدل  
وكلامى بياخده كدا هزار

...

الواد الندل الخربان  
كان نونو قاعد على حجرى  
وعطيته م اللقمة بتاعتى  
وصبح كده راجل ويبجرى  
وبياخد ولأعتى وساعتى  
وكبرت وعوزت لعكازه  
ما سندنى وراح سابنى وطار

.....

الواد الندل الخربان  
أنا قلبى دليلى وكدبته



قاللى الانسان طبقة وقشرة  
وبكل ضمير أنا أدبته  
طاب ليه بتخون يا ابنى العشرة  
دا الكلب بيوفي ويبصون  
طب ليه الانسان غدار؟!  
.....

## أنا شاعر

أنا زَجَّالٌ  
ومتغرَّبٌ على شطوطِك  
ومتبعتر على خطوطِك  
ومكتوبلى أعيش رحَّال  
بتنسيني أوان فرحِك  
تنادينني على جرحِك  
ويوم حزنك أكون شَيَّال  
أنا شاعر أقول الآه  
بيسكني هوى جنِّك  
أنا أصرخ بَدال منك  
ولا عمرك تراعيني  
وتنسيني...تبيعيني  
وأنا دائماً لأوجاعك  
باكون حمَّال؟!  
ورغم الموج على دربِك  
أنا بسمه ليوم كربِك  
أصيد الكنز بافتحك

ألاقي الكون بيرتاح لك  
وشهد الخير نده نحلك  
وليه موجك يغرقني؟!  
وعزالك تفرقني  
وليه طيرك هجر طيني  
ولو حضنك يغطيني  
أعيش عمري أنا ليكي  
ألف الكون أنا بيكي  
كما التاجر أصير جوال  
أنا صابر كما أيوب  
ومتشوق ودايب دوب  
ومن ريقك بنغل توب  
وباسهرلك  
ورغم الشوق بنظهرلك  
أنا شاري ... وبتبيعي  
بأشعارى ينابيعي

ومين غيري .. أنا يدفع تمن مهرك؟!  
ومين غيري .. أنا شايل وجع قهرك?!  
ومين غيري .. أنا ينفع يكون كيال؟! !

أنا شاعر بلون طيفك  
ويوم بردك أكون صيفك  
صفار الكون بلون شمسك  
ولو أزرق يكون نيلك  
ولو أسود رموش ليلك  
أنا أبيض كما ضيِّك  
سمار لوني جميل زيِّك؟!  
ولو أحمر كرات دمك  
أشيل همك  
على بابك أنا حارس  
جناين ورد أنا الغارس  
ويوم عشقك أكون فارس  
أكون خيال  
أنا شاعر أنا زجال  
ومتغرَّب على شطوطك  
ومكتوبلى على خطوطك  
أقول موال

....

## الأب

يعنى ايه إحساس بأب؟!!

يعنى أكبر قلب حب

نبع فيّاض بالحنان

يعنى واحة م الأمان

لو أى خوف جوانا دب

هؤّه يشقى لجل مين؟!!

قضّى مشوار السنين

يجرى ع اللقمة الحلال

كل حلمه يشوفنا تكبر

نفسه يلقي عودنا شب

يعنى إيه احساس بأب؟!!

اسالوا الطفل اللي والده

عنه سافر ولّا غاب

بصّوا ع اللفه ف عينيه

شفتوا..... إيه؟!!

شفتوا حرمان بان عليه

اسالوه و بتبكي ليه  
راح يقول مستنى بابا  
لمّا يجى يدق باب  
دا انت من غيرك يا بويا  
أى دنيا تبقى غاب  
أنت عنوان السعادة  
خبرة العمر وإفادة  
لينا مين ف الدنيا غيرك؟!  
كلنا عايشين بخيرك  
عطر سيرتك طرّح خيرك  
مين بيمل البيت بالبهجة  
مين بينور لينا الوهجة  
مرّة يهزر.. مرة يفزر  
علشان كل عياله ترّوق  
رقة قلبك فيها نصيحة  
كلمة مريحة تقولها صريحة  
كل طموحك دي ف الدنيا  
أنك تلقى ابنك متفوّق  
شاغل كل حياتك بينا

كل كفاحك تعبك لنا  
وتقول حلمي أربى عيالي  
أحلى هدية اللي اديتهالي  
هيه الست الهانم أمي  
بنت أصول وليها أساس  
حاجة تشرف بين الناس  
زارع كل أمالك فينا  
لو جيت مرة يا بابا بعدت  
كل الدنيا ماتكفينا  
بتقول دايمًا حبوا الغير  
وازاى دايمًا ن صنع خير  
بتعلمنا نعيش فى تسامح  
وازاى نعشق رى الطير  
وجناح حبك بيدفينا  
يعنى ايه احساس بأب؟!  
يعنى أكبر قلب حب

.....

## إيه آخرتها

إيه آخرتها معاك طب قوللي؟!

جارج كل جناين فُئلي

قلبي بينزف على أحزانك

تفرح انت بجرحي وذلي

كنت باطوّل بالي عليك

ياما دموعي شافتها عنيك

قاسي وطول عمرك ما تحن

بَاندَم إني اشتقت إليك

طولة البال وياك بتخسّر

كل الصبر عليك ده ما أثّر

بعد الحب اللي اديتهولك

لازم اسيب قلبك يتحسّر

ان كان ع الصبر صبرت كتير

ولا كنت بلاقى معاك تقدير

ولا عمرك كنت ف يوم تستاهل

ولا مرة ف دربك تانى هاسير

.....





## لا.. للطلاق

حبة صبر يا ناس نتحمّل  
نروي الحب اللي ف يوم قل  
نذّي الفرصة لبعض نكمّل  
كل خلاف دا أكيد يتحل  
ليه ننسى المعروف والعشرة؟!  
ونسيب طفل برىء يتذل  
فين الصبر و طولة البال؟!  
أي عناد بيوجب تفريق  
حال الأسرة ف يوم لو مال  
نلقى الكل ف بحر غريق  
حد يشد وحد بيرخي  
ليه نفتح للفرقة طريق؟!  
أب وأم يروحوا بعيد  
قلب بيقسى وقلب أنانى  
لو هنشيل الإيد م الإيد  
مين غير الأطفال هيعانى؟!  
يبقى عشان خاطر أولادنا

لازم نهدي نفكر تاني  
ليه ننسى العهد وبنهد؟!  
حلم الفرحة اللي حلمناه  
انتى حبيبتى وانا مش ند  
فبلاش يلقي الشر مناه  
مين راح ينسى الحب بتاعه؟!  
مين بيفرط يوم فى ضناه؟!  
درب العمر دا حلو و مُر  
أيوه نصيبك وانتى نصيبى  
لو فيه أزمة أكيد هتمر  
لا اغلط فيكى ولا انتى تعيبى  
احنا اتنين ف مركب واحد  
اوعى لحبل الود تسيبى  
فاكرة اللهفة وشوق ف خطوبة  
نحلم سقف البيت يجمعنا  
نبنى حياتنا بطوبة وطوبة  
عشنا الحب حقيقى بمعنى  
ازاى بعد العمر دا كله؟!  
عن بعضينا خلاف يمنعنا

أى خلاف راح يجى يروح  
نتفاهم للرأى نقدم  
كل طلاق دا عذاب وجروح  
ويخلى الأسرة بتتهدم  
على أطفالنا بنبقى جناة  
نبكى بدمع العين نتندم  
اللى يحب كتير بيضحى  
ويخاف بيته ف يوم ينهار  
كل معاندة لجنب ينحى  
ازاى يبني صراعنا عمار  
نفشل يفرح شامت فينا  
والأولاد هتعيش فى مرار  
مهما نعدى بلحظة عصبية  
منخليش أعصاب تختل  
أصل خراب البيت دا مصيبة  
وطعم الدنيا هيصبح خل  
نتعاتب غلطان يتأسف  
ويصون العهد اللى أخل

.....

## نجمة ف براحي

كل نجمة تروح لليلها  
والقمر يجي ف براحي  
لمّا موجة تشد حيلها  
الحبيب يمسح جراحي

.

كل نجمة ليها ضيّ  
وليها قلب تروح إليه  
لو يقول من جرح أي  
بالحنان تمسح عينيه

..

كل نجمة مهما لفّت  
مهما تبعد أو تدور  
حتى لو أضوائها خفّت  
رغم موتها تشع نور

...

كل نجمة ليها حنة  
مهما غابت تيجي منها



كل روح بتعيش فى جتة  
ع الحياة ربك يعينها

..

كل نجم وليه مداره  
وليه أوان بيهل فيه  
لو حبيبى خدنى جاره  
قلبى عمره مايجافيه

..

كل نجمة ليها عاشق  
يعزف اللحن بغناها  
حلمنا ف الروح دا راشق  
ربنا يحقق مناها

...

أى نجمة تلف دايرة  
مش هتمنع إيه يصيبها  
مهما روحنا بتبقى حايرة  
مش هتاخذ غير نصيبها

.....

## قلبك حديد

انت قلبك من جليد؟!  
ولاً متركب حديد  
و لاً أصله م الحجر؟!  
لماً أنه يوم عليه  
ولا عين تشتاق إليه  
ليه بيهرب من بعيد؟!  
ساب مكانه وراح هجر  
قلبي عايش لِسْتِيَاء  
من ألف للحرف ياء  
شاف دموعه مات ضجر  
قوللي قلبك ....  
حَب رَق.....؟!  
ولاً نبضه ف مرّه دق؟!  
قلبي يعزف ليك أغاني  
وانت تحذف ف المعاني  
تهوى ألحان الغجر  
لماً تصحى ف يوم تفوق

والوريد ينبض بشوق  
يجري دمك في العروق  
بعد ما الحب احتضر  
امتى تحس بلهفة قلبى؟!  
ليه بتعيش الحب السلبي؟!  
لمّا حُبك شئ أكيد  
ليه تسيبنى أعيش وحيد؟!  
و الدمع ع الخد انفجر  
ليه بتقسى ع الحبايب؟!  
تجرح القلب اللى دايب  
اللى دايمًا بين إيديك  
أطرى من فرع الشجر  
انت قلبك من جليد؟!  
ولّا متركب حديد  
و لا أصله م الحجر؟!  
.....

## ليل ورا ليل

والليل بي فوت ووراه كام ليل  
ودموع ع الخد يا ناس كالسيل  
وحبيبي بيقسى ما يسأل عنّي  
ساييني أقاسي الشوق والويل

...

الليل بيعدي كأنه سنين  
وباغني لوحدي شجن وأنين  
من كتر اللوعة عايش توهان  
وباقوم ف الصبح الخد حزين

...

ليل العشاق دا طويله حباله  
والهم يحط ثقيله جباله  
ومريض بالحب ما لاقى دواه  
مشغول بحبيب ما حاططنى ف باله

...

الليل للهّم يا ناس بيجمّع  
وتسح العين م الذكرى تدمّع



يا مرار الفرقة على العشاق  
احساس بالوحدة أنين بيسمّع

....

الليل يبعدى بخطوة ثقيلة  
ولا عمر العاشق ليه كدا حيلة  
يسهر بحنين والنار تكويه  
و قلوب م الوجد بتبقى عليّة

.....

## اللى أمه لسه عايشه

يرتوى من فيض حنانها  
يبوس جبينها ليل نهار  
هى سر الحُب ذاته  
هى جنة وهى نار  
هى مفتاح السعادة  
أعلى نعمة بين أيديه  
كل دعوة منها حرز  
يا بخته لو رضيت عليه

...

من رضاها يلاقى سعه  
يبقى كل الخير معاه  
والهنا هيكون نصيبه  
والسما تقبل دُعاه  
بس لو زعلها منه  
كل لعنة تكون عليه  
اللى أمه لسه عايشه  
يا بخته لو رضيت عليه



...

قلب يدّى مش بياخد  
أحلى كنز معاه خزين  
ضحكة منها بقلب صافى  
قلبه يفرح لو حزين  
والهموم وبدعوة منها  
تتفرج لو تبقى إيه  
اللى أمه لسه عايشه  
يا بخته لو رَضِيت عليه

...

قلب مخلوق للمَحَنَةِ  
زيّه ما تلاقى ف وجود  
لو تحس ف قلبى أنّه  
نفسها بالروح تجود  
دعوة حلوة منها صافية  
تَسَوَى ميت مليار جنية  
اللى أمه لسه عايشه  
يا بخته لو رَضِيت عليه

...

واللى أمه يا ناس بعيده  
ذكرى منها تبقى عيده  
لما يتبارك بروحها  
وشوق حنين يعزف نشيده  
راح يحس بانها جنبه  
والحنان ضلل عليه  
اللى أمه لسه عايشه  
يا بخته لو رضيت عليه

...

مهما جنبك ناس كثير  
زيها ما تلاقى حد  
دا اللي أمه ف يوم تسبيه  
كل ضهر معاه تهد  
هى شمسُه وبدر ليلُه  
هى فرحة نور عينيه  
اللى أمه لسه عايشه  
يا بخته لو رضيت عليه

.....

## فنجان القهوة

ليه بيقولوا القهوة مُضرّة؟!

وبتشربها كتير ازاي؟!

أول فنجان رُوحَت شربته

راح خلانى أعوف الشاى

لَمَّا البُن يكون متحوّج

من ريحته أنا بانسى قساي

بلقاه يعدل لِيَّا مزاجي

باشرب صُبْح وبَعْد عشاى

لو تسأل ع الوش بتاعه

سر بيضحك مِنْهُ غُنْاي

حاجة بتنعش لِيَّا دماغي

رَي ما اكون طائر في سماي

قلبي بيعزف ع المزازيك

أسمع أحلى أغانى الناي

لَمَّا يقولوا القهوة بتجهز

لَمَّا باشوف الفنجان جاي

مُخي كمان بيزيد تركيزه

وباصحصح م النوم و عماي  
أعصاب تهذا كمان وتروق  
بَلَقَى الشعر بيحي معاي  
أكتب أحلى كلام بطلاقة  
وكل حروفي تلين كاليَاي  
فنجان واحد ولَّا اتنين  
مش هيجيبلى بجد أذاي

.....

## طبيعة الشاعر

لازم تعرف إنَّ الشاعر  
بيكون مخلص دايماً وافى  
غمره ما يغدر ولاَّ يجافى  
لَمَّا القلب بتاعه يحب  
بيكون صادق لَمَّا يقول  
بس بُكاه فوق المعقول  
لَمَّا يلاقى ورود دبلانة  
ودمع العين بيفيض ويكب  
قلبه بيرعش زى يمامة  
وياما بينزف  
لَمَّا الشوق جواه بيدب  
لازم تعرف  
إنَّ حروف كلماته زروع  
زى النبتة وليها فروع  
لَمَّا تدوق الميَّه تشب  
لَمَّا تشوف الشاعر نايم...  
وسط الدوشة وسط الزيته  
سارح جُوا الملكوت هايم...



إيده بتكتب ميت شخبیطه  
فبلاش تسخر أو تعتب  
أصل الشاعر مش إنسان  
رَى الناس اللى انت شايفها  
قلبه مليون بالإحسان ...  
وكل الصورة الوحشه عايفها  
وساعات هادى كدا ورقيق  
بيقول لفظه بفن دقيق  
وساعات رَى النار بيهب  
إوعى تفكر إنَّ الشاعر  
صعب الشاعر يبقى أنانى  
بس يعانى  
ممکن يكره .. لكن يزعل  
لَمَّا يشوف الطير مجروح  
يلقى الحزن منين ما يروح  
فوق الشوك رجليه بتدبّ

.....



## ليه متقوقع

لية متقوقع جُوه الوهم

ف نفس الموقع

بين أحزانك

رغم الورد الضاحك ليك...؟!!

ليه متعمد جُوه الصورة

تعيش متجمد.....؟!!

سايب بس

تراب الذكرى معشش فيك

مكوى بنار الشوق والغيرة

ماشى برعشه ف سكة حيرة

بتلف وترجع نفس الدائرة

ليه الظل رمادى ماليك..؟!!

ليه على صخرة وجعك راكب

امتى هتلقى الحزن مراكب....؟!!

حتى الموج وياك بيعاند

ليه على شط الغلب راميك

ليه ملفوف ف كفوف حجرية؟!!

نفس الغنوة بصوت غجرية؟!!

تايه ضيِّك من لياليك؟!!

حاطط نفسك جوه الكادر

صوت أشجانك

زَي وهيج الرعد الهادر

طعم الفرح معاك بقى نادر

ليه مش قادر

تعزف لحنك

ع المزازيك.....؟!!

....

## ضحكة الأيام

أهـى الأيـام بتضحكك

ولفالك سنين عمرك

كخيط داير

دليل حاير

وف السكرة

دى بتشدك وبتهدك

وتلعب بيك

ودايماً تطلع الفائزة

بتاخذ زى ماعايزة

ولو عايز فى يوم منها

ما راح تديك

واهى الأيام بتضحكك

بتلعب بيك

بتمشي ف حلم بتخالفك

ولو ف الحزن بتآلفك

وتحكيلك عن الأندال

ومين ف العوزة يستندل

ونفسه تطب تتقنل  
وتتشندل  
ويشتم فيك  
واهى الأيام بتضحكك  
بتلعب بيك  
ف لحظة ضعف بتبيعك  
ما دمع يئن  
ولو كُون داق ما بتسيحك  
ولا بتحن  
وتقطف ورد بستانك  
وشوك عمرك هيفضل ليك  
واهى الأيام بتضحكك  
بتلعب بيك  
....

## استحالة

بنت قرد تكون غزالة  
كل طير يطلع لجنسه  
والبشر يشبه لإنسه  
والكريم ببيان عليه  
والخسيس طبعه الندالة

...

## استحالة

الأصيل يشمت فى حالة  
الشجر تسقيه جذوره  
والثمر ريحته ف بذوره  
والقماشة الحلوة باينة  
حتى لو يوم تبقى بالة

...

## استحالة

تلقى احساس جوا آلة  
كل شئ بيعود لأصله  
كل ورد يبان فى فصله

والخطاوى بتحكى سكة  
والقمر تلقاله هالة

...

استحالة

يطلع الورد ف زبالة  
الإناء ينضح ما فيه  
والأصيل ما يكون سفيه  
اللى أسس بيته على  
والرمادة بتبقى عالة

...

استحالة

تلقى بسكوت من نخالة  
أو بخيل يفتح جيوبه  
مهما بيدارى ف عيوبه  
قلبه يبكى لو عطاك  
م الشحيح ما تدوق نبالة

...

استحالة

الأصيل يصبح حثالة

حتى لو فيه ضيق وأزمة  
الشهامة معاه ملازمة  
عمره ما يخون ولا يغدر  
كلمته درس ورسالة

....

استحالة  
ينقري السرف عْجالة  
كله يظهر م العمايل  
كان أساس زين ولا مايل  
أصل دساسة العروق  
وكل عنوان ليه دلالة  
استحالة  
بنت قرد تكون غزالة

.....

## دقة قلبي

قلبي دق وليكى عاشق  
داب ورق وفيكى راشق  
قال نصيبى... ليه تغيبى؟!... وشوق تجيبى  
ومن بُعادك  
قلبي يفضل ف المرار  
قلبي شق طريقه سافر  
كان بيسهر كان يعافر  
لَمَّا شافك.... هام ولافك.... داق خشافك  
زاد غرامه  
عاش ف حيرة وانبهار  
كان بيحلم بس بيكى  
نفسه يقدر ويراضيكى  
ليه غدرتى؟!...وليه هجرتى؟!....ومش صبرتى  
ومن عذابك  
سيبتي قلبي في انهيار  
...  
قلبي مخلصك برئ



ف اختيارك كان جري  
بس كان قلبك أناني  
راح وسابني ليه باعاني  
غير الكلمة ومعاني  
سابني وحدي  
بابكي لهفة ليل نهار  
لو تروحي... تزيد جروحي  
ينفتح للدمع باب  
ليه تزيد ف العتاب ؟!  
قلبي غنى ليكي راب  
لو عزفتي لحن حب  
م الوجود يمحي الغبار  
بحر موجك خدنا شد  
بس حب القرب مد  
لينا عادك... ليه عنادك... زاد بعادك  
والفراق يكثر يزيد  
والقلوب تصبح ف نار  
.....

## لو قلبك متشبع حُب

لو قلبك متشبع حُب  
كان يظهر قمرك فى سماه  
ويزهزه ورْدك بمُناه  
ولا يكره حد ف دنياه  
وبرئ ع الفطرة بنياته  
والفرحة بترقص بغناه

..

لو قلبك متشبع حُب  
كان رشرش ع الكون أزهاره  
كان يروى الصحرا بأنهاره  
ولا عُمره بيحقد ع الناس  
والبدر ف ليلئه ده ونَّاس  
والشمس بتغزل فى نهاره

..

لو قلبك متشبع حب  
كان دايماً فاكراً أحبابه  
والخير متمخطر على بابيه

والضحكة الحلوة بتتبسّم  
من عطر عبيره بنتنسّم  
ولا ذم ف صاحب يوم عابه

..

لو قلبك متشبع حُب  
كان يفرح بالخير يتعطرّ  
وكلامه على ناي متسطرّ  
والطبع القاسى مش فيه  
ع الجرح يطبطب يشفيه  
كالغيم المبهج بيمطرّ  
لو قلبك متشبع حُب  
كان يظهر قمر ك فى سماه

.....

## حلو الهزار

حلو الهزار لو بالأدب  
بس الحكاية بَقِتْ عجب  
ما حد محترم الكبير  
ولا حتى عاجبه صيام رجب  
حلو الهزار لو باحترام  
نِدَى الكبير حق المقام  
نملا الحياة بالفرشة  
والفرح عمره ما كان حرام  
حلو الهزار من غير أذى  
ولا صاحبي يزعل وانخزا  
يرعى شعور الزعلانين  
والضحك مايكنش ف عزّا  
حلو الهزار لو بالأصول  
مش همبكة لجل الوصول  
يرعى المشاعر والمزاج  
دا الطقس فيه أربع فصول  
حلو الهزار من غير غلط

فيه فرق بين رملة وزلط  
مش أى حد هيقبلك  
راعى شعورنا المختلط  
حلو الهزار من غير سباب  
أو حتى لفظ يجيب عتاب  
الضحكة بتتور وشوش  
تلقى العجوز يرجع شباب  
حلو الهزار من غير وجع  
ترسم سعادة تكون جدع  
حلو الهزار لو كان ظريف  
أو نكتة باللفظ الطريف  
يحفظ كرامتي مع الصحاب  
ولا عمر دمي يكون سخيـف  
.....

## كنت بأسهرلك

كنت أسهر ليك ليالى  
كل حزنك بابكي ليه  
وشي لو شافك بيضحك  
لجل تلقى الفرح فيه  
قلبي فاتح ليك ببيانہ  
وانت تلعب برضه بيه  
عمره ما فكَرَّ يخونك  
وكل حبك بيداديه  
عاش بينبض لك بشوق  
وانت برضك بتجافيه  
كان يقولك تحت أمرك  
قبل صوتك ما يناديه  
قلبي كان دايماً يسامحك  
ليه بتغدر وتعاديه؟!  
كنت باهديلك فى وَرْدَى  
وانت تقسى وما تراعيه  
ده اللى دُفِّتَه من مرارك  
بكره حتمًا هتعانیه

## كنت باحلم

كنت باحلم أبقي حاجة  
أبقي مطرب ولأ بيه  
حتى أبقي نص شاعر  
يكتب الغنوة بإيديه  
ولأ بلياتشو ف مسارح  
رغم حزنه يبقى سارح  
يرسم الضكه ف عينيه  
كنت نفسى أبقي تايسون  
ولأ بيبو ... أو بيليه  
دمعة نزلت فوق خدودى  
وقلبي كان صعبان عليه  
رحت سائل أيّوه نفسى  
الحياة دى قاسيه ليه  
ولمّا بصّيت ف المرايه  
عقلى قاللى شوفت ايه  
شفت قطر العمر فات  
والسبنسه كومبليه





ولاً أسرار السعادة  
رافضة تفتح بابها ليك  
شعرنا فصحي وغنائى  
وكل ألوان الفنون  
ساعة يوصفك عنائى  
ومرّة حكمة من سطوره  
ينشر الضحكة بعطوره  
وألف بيت يكون جنون  
الشعر مش وزن وقوافى  
أو مجرد تفعيلات  
شعرنا إحساسه دافى  
يرسم الصبح بنبوءه  
ويحكى أحزان اللى فات  
الشعر مش حبة حروف  
أو حكاية ف كلمتين

.....

## طُظ ف اللى راح

طظ فعلا ف اللى راح  
لسه قلبى فيه براح  
بُكره هاعشق من جديد  
وانسى غدرك والجراح  
غار ويمشى ....وطظ فيه  
دا البعيد أهبل سفيه  
قلبى كان يسهر عشانه  
هُوّه كان يقسى يجافيه  
طظ فيه ....وفي الحاجات  
دى هديه ياريت ما جات  
كان شريط ملين أغانى  
قاللى باعشق صوت نجاه  
بعد ما قلبك يبيع  
تفتكر إننى هضيع...؟!  
هامسحك من ذكرياتى  
والقى كل الكون ربيع  
طظ فعلا ...طظ فيك

دا الغرور دايمًا ماليك  
لو مشيت وياك حياتي  
كنت هبقى مَبلى بيك  
اللى زيَّك مش بشر  
أنت فيروس وانتشر  
الخبائة.. .. والنجاسة  
أنت من إبليس أشر  
طظ أيوه... طظ تانى  
طظ مالياها المعانى  
ياله روح ف ألف داهية  
دا الشيطان منك يعانى  
اللى زيَّك كان كتاب  
واللى يقراه يبقى خاب  
ندل ما تخشى الملامة  
مش ها ينفع فيك عتاب؟!  
.....

## رثاء زوجة

سايبة صورتك ع الحيطان  
ضحكة ما تفارقش بالي  
سايبة ريحتك في الغيطان  
وردة مزروعة ف عيالي  
مين هاينسى يا ناس ملاك؟!  
صُورته مرسومة ف خيالي

...

يااااااه

ليه سيبتيني لوحدي وغيبتني  
وعارفه حمل عيالنا ثقيل  
كنت اتوانس بيكي حبيبتي  
كنتي ف سكة عمري دليل

....

أنا من بعدك  
زى عيالك كدا متيتيم  
لحظة بعدك

لمّا تعدى حبيبتي ف طيفي

ألقى الدنيا معاً بتعمّم

...

لَمَّا باشوف بنتك محتارة

عايزة نصيحتك وانتى الأم

لَمَّا أشوف ابنك بيعيِّط

يمسك صورتك فيها يضم

نار ف قلبي يا ناس بتوهوج

والقى الدنيا عذاب بتغم

.....

## اللى باع يا قلبى

اللى باع يا قلبى بيعه  
واستريح من نار عذابه  
كنت تروى غيطان ربيعہ  
وترسم الفرحة ف كتابه  
اوعى تزعل يوم عليه  
ولاً تفتح يوم عتابه  
اللى باع يا قلبى سيبه  
وانت كسبان القضية  
اوعى تقبل بالمساومة  
كسر قلب مالو هش ديّه  
سيبه هيدوق المرار  
هو ذات نفسه اللى جابه  
اللى باع يا قلبى بيعه  
واستريح من نار عذابه

....

اللى باع دايمًا بيخسر  
شوف بعينك ألف عبرة

أَيَّوَهُ قَلْبَكَ عَاشِلُهُ صَدْمَةٌ  
بَسْ خَذْتُ الدَّرْسَ خُبْرَةٌ  
وَكُلُّ مَوْجٍ جَرَحَكَ يَعْذَى  
وَبُكْرُهُ تَتَعَوَّدُ غِيَابَهُ  
الَّتِي بَاعَ يَا قَلْبِي بِيَعَهُ  
وَاسْتَرِيحَ مِنْ نَارِ عَذَابِهِ

...

الَّتِي بَاعَ مَا يَسْتَهْلِكُ  
أَيُّ دَمْعَةٍ فَ يَوْمٌ عَلَيْهِ  
وَالَّتِي يَجْرَحُ قَلْبَ مُخْلِصٍ  
بُكْرُهُ يَطْلُعُ مِنْ عَيْنِيهِ  
رَاحَ يَعِيشُ الْعَمْرَ كُلَّهُ  
يَبْكِي عَ الْقَلْبِ الَّتِي سَابَهُ  
الَّتِي بَاعَ يَا قَلْبِي بِيَعَهُ  
وَاسْتَرِيحَ مِنْ نَارِ عَذَابِهِ

.....

## العريس الهارب

أجى ازای وقافلین بابکم؟!  
اصل المهر بتاعکوا دا غالی  
لیه الفهم وتقدير سابکم؟!  
طالع ابوکى کتیر ف العالی

..

حاجة تجیب الغیظ والقهر  
رغم الحب ف قلبی دا لیکی  
رافع ابوکى الشبكة ومهر  
عايزك جنبه خلاص خلیکی

..

عايز قايمۃ تهد الحیل  
وفرَحنا تكون قاعة كبيرة  
والطبلۃ اللى ترقص خیل  
ومزود ع العشوة البيرة

...

وامك عایشۃ الدور السلبی  
ازای قال ف القمرۃ نفرط



وأخوكى بيتعبلى ف قلبى  
عامل فيها كبير يتشرط

...

هيا جوازتك بيعة وشروة  
قاعد أبوكى يزيد ويفاصل  
نتفوا الجلد بتاعى وفروة  
وحطو ما بينى وبينك فاصل

ايوا أنا عايز أبقى نسيبكم  
ف الأفراح والخير نتلم  
لكن غصبن عنى هاسيبكم  
أنا مش ناقص حرق الدم  
أنا مش ناقص حرق الدم

.....

## شَدَّى الخيوط

شَدَّى الخيوط واتمخرى  
حلمك جميل لِسَّاه طرى  
برعم يا دوبك ع الغصون  
باصص على شباك حياة

..

مَدَّى الخطاوى ع الدروب  
حلمك دا بيخاصم غروب  
رغم الغيوم مالىه السما  
الشمس بتغير من ضياه

....

سَدَّى الجروح لو نازفة  
غنّى الحروف العازفة  
الورد لو دبلان عطش  
الضحكة فوق وشك مياه

...

هَدَّى الحيطان المانعة  
تلقى الجنائن يانعة

ايدك تطبطب ع الجراح  
يشقى بلمسك من عياه  
حلمك دا برعم ع الغصون  
باصص على شباك حياة

.....

## تايه سواح

أنا ماشى غريب والشمس تغيب

ولا لاقى حبيب

يسندنى ف دربى و طريقى

أنا جيت سواح وقمر رَوَّاح

وشجن فَوَّاح

الهجر منشَفَّ ليه ريقى !؟

..

وكتب وفنون وسهر وعيون

والليل مجنون

والحلم مللع فى بريقى

ومشيت تعبان أمضغ ف لبان

وقفلت بيبان

ويا سكة ومالك بتضيقي

..

اشتقت إليك وندهت عليك

خطفتنى عينيك

ومليت من حبك ابريقى  
أنا ماشى وحيد والضى بعيد  
وغزالى شريد  
عطشان لحنانك يا رفيقى  
أنا حبى خضار أبيض وسمار  
والقسوة دى نار  
والشوق بيلهلب فى حريقى  
وعزفت كلام وباشوف أحلام  
لحن ف أفلام  
وغرامى لقيته دا حقيقى

.....

## لحظة ضعف

يا سلام ع الشلة وع اللمة  
وقالولى يا واد خدلك شمة  
عيش الإحساس روق بالك  
هتشد العالم بحبالك  
للنشوة وبهجة وتفاريح  
هتسافر ببساط الريح  
الهم بعيدك راح يجرى  
وأغسطس يصبح يوم هجرى  
كاف دال راح تصبح متأفور  
والدنيا هتحلو تروق

...

م السم يا ناس انا باتهرب  
للمال والصحة ده بيخرب  
وف لحظة ضعف شيطان قرب  
أهى مرة هزار كدا ونجرب  
ببلاش وفلوسها دى مدفوعة  
شميت ويادوب راس مرفوعة

ولقيت الدنيا بقت هو  
والراس بتصرخ وتشو  
وعيون بتبرق وتبحلق  
والأرض تلف و بتزحلق  
والناس ودانها قرون حو  
وكأنى راكب فوق موجة  
والزحمة كتيرة مع الهوجة  
والدنيا دى حُق  
وأنا فيها بزق ومين ساند  
ودماغ بتلق  
وصداع بيدق وبيعاند  
برشامة بتتلف أعصابى  
بتمرّج فيا وبتسوق  
....

وبلاوى كتيرة بتحصلى  
لما باخد الجرعة  
لا باصوم ولا بقدر كدا اصلى  
والبحر ف عيني باشوفه ترعة  
لو شفت السلحف يوم ماشى

أضحك ع السرعة  
طاير ف الجو تقول ريشة  
ما العقل دا لاغى متغمّس  
واقول ع السلكة ياناس فيشة  
يا حلاوة دماغى لما تلمّس  
وسجارة خابور ويّا الشيشة  
ولاغيك وتلاغى وبنخمّس  
وساعات ف البرد كدا تشوفنى  
أنا قالع ملط  
من ريحتى هتبعد وتعوفنى  
أنا بالع خلط  
منفوخ بالوهم وع الفاضى  
مش شايفك مين  
أحكى ف مستقبل والماضي  
وفتاوى الدين  
وافضح أسراركم لما باسكر  
يا ولاد ستين  
وأهو حالى مرار بقى متلخبط  
لو شفت العنز انا فيها باخبط



مش عارف بيتي ولا غيطي  
سهران كدا سلبى  
ف الصبح ببيت  
والكبد دا بايظ متفرفر بلغم على قلبى  
متحرك ميت  
ومفلس دايمًا محتاج  
اسرق موستكل اخطف شنطة  
مجرم ويخيل  
أوهامى بتنفع مونتاج  
ألبس زعبوط ويا الزنطة  
صراصير تخايل  
وبقيت متشندل متقندل.. عايش مخنوق

....

ببلاش ف الأول ادونى  
على سكة موتى وشدونى  
ودخلت خلاص كدا ف الدائرة  
ومشيت ف الخطوة المش سايرة  
انا لازم أدفع و أشارك ...  
وأرد واجبهم

دا انا واد بحبوح ومتحارك. .

وصبحت عاجبهم

وفتحت أنا صدرى وبوسّع

ولقيت القرش يا ناس خسّع

والكيف دا عقارب بتلّسّع

دا انا قبل المر المتقطرن

الرزق معاى كان بيبارك

وبقيت محتاج وبتسلّف

أهملت ف شغلى وبتخلف

تعميرة الطاسة بتتكلف

ومراتى بتشخط وتعارك

مصاريف البيت مش لاقينها

ما عيشتنا كانت مستورة

ايه بس اللى جرى لك؟! فووووق....

...

من كتر ديونى بقت قافشة

بَزْهن وببيع كدا ف العفشة

مش فاضى لا لواد ولا بت

متنرفز باشخط وباهتّ

والصحة اتهدت والحيل  
والدنيا اسودت كالليل  
وحياتى العمرانة دى خربت  
والفرحة من بيتنا دى هربت  
وانا خيبتى بدأت بهزار  
فبلاش تجرب وتدوق

....

## إيه يرضيكي!؟

يرضيكي قصيدتي تكون مهرك  
وبحوري تخالط على نهرك  
والحبر السائل على ورقى  
يصبح متعطر من ورقك  
يرضيكي أكونك نجمة ليل  
ولا فارس جايك على خيل  
لو جفت مرّة ف يوم أرضك  
فدموعي ها تصبحك سيل  
يرضيكي ايه بس قوليلي!؟  
يرضيكي أوزنك أشعاري  
على صوت النغمة ف تنهيدك  
وقصايدى تكون فنجان قهوة  
تشربها شفايفك من إيدك  
دا انا نفسى أقولك اغنية  
أنقشها بشوقي فوق جيدك  
يا حلوة قوليلي واتمنى

يرضيكي أكون حنة سكر  
بأيديكي تفروول وتدوب  
أغزلك شالى المتعطر  
وف ثانية هايصبح دبذوب  
دا الضحكة بتاعتك خلتنى  
أكتب أشعارى بطلاسم  
على رقى أرسمها قلوب  
يرضيكي ايه بس قوليلى؟!  
يرضيكي أكون ملاح عايم  
مش لاقى لا مركب و لا شط  
يرضيكي أعيشلك كذا هايم  
لا حروف قدامى ولا خط  
ولا طير على قصرى كده حايم  
ولا طار من شوقى ولا حظ  
يرضيكي ايه بس قوليلى?!

.....

## حزنك يا أمي

احضنى قلبى اللى خايف...

نفسى ف كفوفك أنام

روحي تعبت م الرجايف

بالخداع ماشية الأنام

لما باجى جنب قلبك

باسمعه بيقول كلام

ضمى أكثر طبطبى

خبى ابنك م الآلام

احضنى قلبى اللى خايف...

نفسى ف كفوفك أنام

احضنى وضمينى تانى...

بعدك انتى ليا مين؟!

قلبى لو مكسور يعانى

دعوتك تمحى الأئين

لفلفى دراعك عليا

وامسحى دمع الحزين

لما شوفت الدنيا قاسية

وناس كثير متلونين  
نفسى أرجع طفل يحبي  
ويبقى أفضل لو جنين  
احضننى وضمى تانى....  
بعدك انتى ليا مين؟!  
حضنك يا أمى اكسير حياة...  
بلسم بيشفى م الوجع  
وقت الجفاف بيفيض مياه  
يروى الفؤاد اللى انفجع  
حضنك يا أمى يضمنى  
بلقانى طفل برىء رجع  
احساس شعورى ما يوصفه  
شعر البوادي ولا السجع  
حضنك يا أمى اكسير حياة..  
بلسم بيشفى م الوجع  
عارفة حضنك دا أمى؟!....  
دنيا واسعة وكون براح  
لفلى جناحك وضمى  
ضمتك تشفى الجراح

ياما جبرك كان سايغنى  
وياما فيه قلبى استراح  
جوه عبك كان دافيا  
وكننت بلقى الخوف دا راح  
عارفة حضنك دا يا امى؟!...  
دنيا واسعة وكون براح  
ايوه احضنينى وطبطبى ...  
ضمى بدراىك ع الضلوع  
انا بين ايدىكى رضيع صبى  
وازاى على كتفك أجوع  
لو بحر يعلا ف يوم يهيج  
دعوتك تصبح قلوع  
لو خيرونى ف دنيتى  
أتمنى للحجر الرجوع  
ايوا احضنينى وطبطبى. ..  
ضى بدراىك ع الضلوع

.....



## حبة مشاعر ع الورق

حطى كف الشوق عليا  
واحضننى بين ضلوعك  
لما شمس الكون بتغرب  
دنيتي بتحتاج طلوعك  
انتى حرى وانتى ضلّى  
غير حنانك إيه فاضلّى؟!  
لو جرفنى موج هواكى  
اسحبى روحى بقلوعك

.....

## الشاعر في سطور

- الشاعر راضى على الطهطاوى
- سوهاج .طهطا ..عرب بخواج...مواليد ١٩٧٨
- عضو اتحاد كتاب مصر
- ليسانس الآداب والتربية قسم اللغة الانجليزية
- دبلومة مهنية دبلومة خاصة بالدراسات التربوية...
- باحث ماجستير جامعة المنيا
- معلم أول أ ثانوى لغة انجليزية
- عضو نادى الأدب بطهطا
- محاضر مركزى بوزارة الثقافة
- صفحته على فيس بوك

<https://www.facebook.com/profile.php>

?id=١٠٠٠٠٧٩٤٣٨٥٩٥٥٨

صدر له

- ديوان / همسات القلب - شعر عامية ٢٠١٠
- ديوان / همسات الروح - شعر عامية ٢٠١٠
- ديوان / همسات انسان - شعر عامية ٢٠١٠

ديوان / الضحك الصينى المستورد - شعر عامية ٢٠١١  
ديوان / دموع قلم - شعر عامية ٢٠١١  
ديوان / مازالت الضحكة فى جيبى شعر عامية - ٢٠١١  
ديوان / بحار بلا مجداف - شعر عامية ٢٠١١  
ديوان / شعاع جوا حيطان الضلمة - شعر عامية ٢٠١٢  
ديوان / ومازال الحلم يحبو - شعر عامية ٢٠١٢  
قاموس فى اللغة الانجليزية... القاموس المتناغم ٢٠١١  
ديوان / فنجان القهوة اللي بيضحك - شعر عامية ٢٠١٨  
ديوان / بكاء قصيدة - شعر فصيحى ٢٠١٨  
ديوان / ضحكة فوق وش الضي - شعر عامية ٢٠١٨  
حاصل على عدة جوائز وشهادات تقدير من كثير من  
المحافل الثقافية  
له مداخلات ولقاءات إذاعية وتليفزيونية عديدة  
له كلمات مغناه على اليتيوب لبعض الأصوات الفنية  
الشابة

## الفهرس

م	اسم القصيدة	رقم الصفحة
١	العنوان	١
٢	بطاقة الكتاب	٢
٣	إهداء	٣
٤	أسرار السعادة	٤
٥	لو زرعت	٦
٦	حكاية عشرة هانت	٩
٧	رسمتك	١٣
٨	حفلة الزواج - آدم وحواء	١٥
٩	دفيانة بيوت	١٧
١٠	اللي زيك	١٨
١١	الإرهاب	٢٠
١٢	مهما العالم مر	٢٢
١٣	الطن غالي	٢٤
١٤	طقوس شاعر	٢٧
١٥	الواد الندل	٣٠
١٦	أنا شاعر	٣٤
١٧	الأب	٣٧
١٨	إيه آخرتها	٤٠
١٩	لا للطلاق	٤١
٢٠	نجمة ف براحي	٤٤
٢١	قلبك حديد	٤٦
٢٢	ليل را ليل	٤٨

٢٣	اللي أمه لسة عايشة	٥٠
٢٤	فنجان القهوة	٥٣
٢٥	طبيعة الشاعر	٥٥
٢٦	ليه متقوقع	٥٧
٢٧	ضحكة الأيام	٥٩
٢٨	استحالة	٦١
٢٩	دقة قلبي	٦٤
٣٠	لو قلبك متشبع حب	٦٦
٣١	حل الهزار	٦٨
٣٢	كنت باسهر لك	٧٠
٣٣	كنت باحلم	٧١
٣٤	قصة الشعر	٧٢
٣٥	طظ في اللي راح	٧٤
٣٦	رثاء زوجة	٧٦
٣٧	اللي باع قلبي	٧٨
٣٨	العريس الهارب	٨٠
٣٩	شدي الخيوط	٨٢
٤٠	تايه سواح	٨٤
٤١	لحظة ضعف	٨٦
٤٢	إيه يرضيكي	٩٢
٤٣	حضنك يا أمي	٩٤
٤٤	حبة مشاعر ع الورق	٩٧
٤٥	الشاعر في سطور	٩٨
٤٦	الفهرس	١٠٠

